

四庫全書

史部

欽定四庫全書

聖祖仁皇帝親征平定朔漠方畧卷十六

八月庚寅朔喀爾喀台吉哈瑪爾帶青等告請
効力哨探副都統阿南達奏言臣來寧夏有喀
爾喀四等台吉哈瑪爾帶青等要於路而告曰
聞遣厄魯特之巴圖爾額爾克濟農之人坐哨
我等雖屬庸劣願與伊偕往邊哨倘可自効當
竭力報稱奏至

上許之

己亥將軍伯費揚古奏報噶爾丹使人梅寨桑等起行費揚古奏言侍郎滿丕欽奉

上諭於是月初七日到喀倫名噶爾丹使人梅寨桑等至授以

勅書梅寨桑等跪而受之隨以土默特之都統副都統及諸官員願助羊四十隻賞給之梅寨桑等率其下人叩頭謝

恩於初八日親視其起行謹具奏

聞

辛丑

命暫留噶爾丹使人回子塔什蘭和卓等於邊內將

軍博濟奏言

臣欽奉

上諭備兵邊塞以扼噶爾丹經行之地因思邊外有水
草要地不可不豫為據守乃遣肅州總兵官潘
育龍率精兵二千駐防三岔河隨據報稱噶爾

丹屬下回子塔什蘭和卓等五百許人過我汛
哨而來擒解軍前據塔什蘭和卓言我等被逐
自喀倫博羅鄂博行至烏蘭厄爾幾遇噶爾丹
使人梅寨桑等彼選擇馬畜賣

皇上勅書赴噶爾丹處我輩因馬畜不堪不能同行是
以留此合計妻子約五百許口我等向沐

聖主洪恩得以生全不知噶爾丹作何陳奏將我等逐
出今在生死之間所以茫茫奔走臣竊思西寧

等處亦係內地不便使若輩貿易即應遣回但
目下正在防禦噶爾丹之來又不便遣之迎往
請將此回子等發兵督後押至肅州邊內暫行
拘留俟青草枯後遣人將昆都倫及厄濟內河
以內邊城以外凡有草處盡行燒荒所備綠旗
官兵各回本汛後再將此回子輩撥官兵押護
從彼來路逐回疏至

上從之

丙午調兵備噶爾丹先是京城預備大兵已派
為三隊第一隊都統公宗室蘇努都統李正宗
諾穆圖前鋒統領碩鼐護軍統領蘇赫副都統
張所知孫徵灝扎喇克圖納秦喻維邦宗室巴
賽張朝午前鋒及八旗滿洲漢軍礮鳥鎗俱往
每佐領下護軍一名上三旗包衣護軍六十名
第二隊都統阿什坦噶爾馬副都統摩爾渾碩
岱護軍各二名第三隊都統胡巴伊勒慎副都

統秦布龍什庫護軍各二名至是

上巡視口外

諭內大臣明珠等曰聞噶爾丹有順克魯倫而來之
信京城所派預備兵三隊應令作速起行第一隊
著於是月二十四日啓行所派諸王及兩班侍衛
與俱二三隊行期各間一日盛京預備兵二千寧
古塔預備兵一千著尅期會集於烏爾惠之地再
檄知黑龍江將軍薩卜素令遠行偵探倘噶爾丹

侵犯車陳汗地方聽酌量行事設有來前聲息即踵其尾以進薩卜素有烏喇兵處可率之去不用仍著往會盛京兵盛京烏喇二處命副都統齊蘭布往諭之科爾沁兵著派二千名來會於烏爾惠地土默特貝勒額爾德穆圖令速回將伊所屬并貝子喇思查普旗兵酌量派出亦往與盛京兵會遣理藩院官一員赴教漢柰曼亦將兵酌派帶至巴林台吉阿喇卜坦處京城預備兵令勿裹糧

輕身前來支領坡賴村米此處大臣侍衛官員等
所有駱駝令往運坡賴村米給放在此兵卒前鋒
叅領夸色著署左翼前鋒統領其前鋒叅領可於
新滿洲內選署之再著古北口總兵官何應元石
匣副將馬進良於兩處官員內將人材健壯兼有
馬匹者約選二十員帶來其前來官員著各携軍
器鳥鎗以至速檄知之

丁未

命減預備兵數

上諭議政大臣曰預備兵數過多可減至八千爾等其
集議之議曰原派八旗護軍親隨護軍烏鎗護軍
前鋒軍驍騎兵及內府驍騎兵滿洲火器營兵
漢軍烏鎗兵共一萬三千九百六十八名今遵
諭減派除滿洲漢軍隨礮官兵不減外每佐領下止
派護軍五名前鋒一名烏鎗護軍一名八旗滿
洲火器營兵四百名漢軍烏鎗兵二千名共兵

八千三百八十四名餘悉減去其預備大臣俱
令率兵全來每旗照所出兵數派官五員統之
議入

上從之復

諭議政大臣曰現今無甚緊急聲息頭隊兵行期定
於二十六日二隊兵定於二十八日三隊兵定於
三十日俱令齊備以待如有急務星速往調來兵
三隊須擇水草善地牧養馬匹緩緩前來

命撤副都統阿南達回

上諭大學士伊桑阿曰聞噶爾丹果有來克魯倫之信
可令副都統阿南達自甘州回其兵仍留駐防禦
將軍博濟亦著回寧夏速檄知之

巳酉

上密授科爾沁土謝圖親王沙津方略時

上獵於木蘭駐蹕克勒吳掠蘇台土謝圖親王沙津來

請

安

上召入行宮密諭曰噶爾丹為人極其狡猾不得不迅速掃滅欲發大兵往征恐彼聞風遠遁及至撤兵彼又復來擾爾蒙古是諸部落不得寧居矣今畢立克圖獲噶爾丹遺爾書內既有乞爾遣人於彼之語爾可藉此遣人語噶爾丹云我料爾沁十旗俱已附爾矣爾可前來我等當從此地接應以此說之誘至近地於時朕親統大軍風馳電擊彼不

及遠遁斷可滅矣爾可仍遣前所差俄齊爾往遂以

御服龍袍一銀鼠褂一

賜之既而

上遣侍郎西喇往與土謝圖王沙津密授俄齊爾說噶爾丹之計視其起行其時西喇即以遣俄齊爾之故差人密諭達爾漢親王班第及諸台吉

臣謹按噶爾丹性生狡黠久習戰鬪見易則

進知難而退往來飄忽踪跡無常誠非可一朝繫頸制命之寇也曩年噶爾丹逆謀狂逞入我烏闐布通之地領兵諸王大臣雖擊却之而不能殲勦反遣人語內大臣蘇爾達使盛京烏喇科爾沁諸路兵勿與之戰是以噶爾丹奔竄竟不邀擊縱之逸去蘇爾達與土謝圖親王沙津達爾漢親王班第等共商遣阿喇善之人俄齊爾等使噶爾丹暫止而竟不

肯少留倉皇急走於是衆皆疑科爾沁以為
已附噶爾丹矣將軍薩卜素等亦密奏科爾
沁有異心

皇上絕不之疑既而噶爾丹遺土謝圖王沙津書佐領
畢立克圖得之出首

皇上睿謨深遠又隱之不洩後沙津元旦來朝

皇上以薩卜素等密奏及畢立克圖首書當諸王台吉

前宣示沙津復

諭之曰爾科爾沁自

太祖

太宗之時歸附以來世世職貢相為姻親歷有年所爾等
斷無此意朕衷略無所疑果有可疑亦不如是宣
諭矣

溫旨下頒沙津及諸台吉皆叩首奏云衆皆密奏言
我科爾沁已附噶爾丹而畢立克圖又密首
噶爾丹遺我之書蒙

皇上略不疑我反明白宣

諭臣等亦復何言但效死以報

高厚之恩而已其意既誠

皇上仍俟時而動未幾獲敵人情形實跡見有可乘之
機遂密授沙津誘致噶爾丹之計沙津感戴
聖上仁恕不疑謹遵

諭旨仍遣俄齊爾往與噶爾丹約噶爾丹果來近地
大為我師所敗隨抵滅亡由是觀之自噶爾

丹烏闌布通逸去之後

皇上時厯於懷早夜籌所以圖噶爾丹之策至獲噶爾丹遺沙津等書乃因其計而用之引之前來
深勞

睿慮始得奏勲

聖德神功誠邁於古帝王之上矣

庚戌尚書班第奏報噶爾丹情形班第奏言臣

遣喀爾喀貝勒汪扎爾部下兵孟索和等四人

於本月初三日賫文往送公西卜退哈灘巴圖
爾及納木扎爾陀音扎薩克台吉阿里雅貝勒
根敦帶青十三日孟索和等還言我等於初七
日至台吉阿里雅處阿里雅等聞噶爾丹聲息
皆會集一處現居俄農額奇河根敦帶青居烏
蘭阿拉兒地方我等於初八日自阿里雅處起
行至巴爾泰罕地方遇厄魯特兵前來追逐我
等奔出立於高阜處遠望見厄魯特兵沿克魯

倫河屯劉踪跡甚衆我等向內來時視其行蹤
西卜退哈灘巴圖爾納木扎爾陀音等已往陰
山之北而去見噶爾丹兩枝兵隨後往追之謹
具狀以

聞

增發官兵

上諭議政大臣曰前因備兵過多曾經減退朕今思之
仍宜備兵一隊此所備者於前減護軍三名親隨

護軍一名再增每佐領下護軍各一名烏鎗驍騎
一千二百名烏鎗護軍四百名按烏鎗驍騎之數
派夸蘭大及章京統之其增發之護軍俱派實授
叅領統之至諸王不必隨現來之兵而來可於後
隊兵內一同預備至八旗察哈爾地方所有牧羣
內現在可用之驕馬二千餘匹着交都統將各旗
馬匹調取交部分給八旗現備之兵以克拴養馬
額至都統胡巴伊勒慎諾穆圖護軍統領蘇赫副

都統龍什庫張所知目下不必前來亦着於後隊
兵預備此軍未出之前朕當到京其增發之大臣
俟朕進京另奏

辛亥

命護軍統領鄂克濟哈副都統扎喇克圖巡行邊哨
遣使賫

勅往諭噶爾丹時噶爾丹劫掠喀爾喀漸入內地
上特使阿爾必特祜賫

勅往諭之

勅曰尚書班第於八月二十二日奏報爾擁兵來西
卜退哈灘巴圖爾及納木扎爾陀音等所居近地
肆行掠害前爾自烏闌布通敗竄時於內大臣吳
丹前跪禮威靈佛像誓不再侵中華皇帝之喀爾
喀與衆生靈爾之印文誓書昭昭具在也且爾每
有奏疏自謂遵行達賴喇嘛之教迺於朕與達賴
喇嘛議結之事屢生釁端蔑棄誓言是爾於其教

名為遵奉實則悖違朕前已有旨詳悉示爾茲無
他諭但爾今之來必有其意應備奏陳朕自有裁
奪此兵果爾親帥與否差五品官阿爾必忒祜前
往確詢故諭

癸丑將軍伯費揚古奏請率兵相機行事費揚
古奏言尚書班第移文內稱探得西卜退哈灘
巴圖爾等已往陰山之北而去噶爾丹率兵尾
進先是臣因未獲噶爾丹確信謂察馬哈地方

乃東西通衢故統大兵駐此今閱班第來文則
偏在歸化城之東北是以臣等公商一面差人
令王善巴及喀爾喀諸扎薩克移入哨內一面
將右衛兵交副都統党愛使守歸化城臣親率
大兵往四子部落蘇尼特等處駐劄相機行事
奏至

上從之

九月戊辰副都統齊蘭布奏發

盛京官兵先是

上諭副都統齊蘭布侍衛臘八什曰盛京年來歲歉恐
軍士難以征行朕甚念之爾等前往可會同彼處
將軍副都統詢明軍衆令其出征官兵可給糧兩
月併給來歲一年俸餉至是齊蘭布等奏言臣等
至

盛京宣

旨其軍士皆以歲值游饑屢蒙

聖鑒

賜銀發粟咸俾更生願得竭力軍前以仰答

皇上愛養至意環跪陳請於是官兵各與兩月糧及來
歲一年俸餉辦裝畢於九月初六日將軍緯克
托副都統穆泰率之起行具狀以

聞

已已

諭各路還師秣馬時將軍伯費揚古奏言坐臺員外

郎博洛叩報稱八月二十九日暮有昆都倫博碩克圖王所差探聽噶爾丹聲息人還言我等於是月二十一日至克魯倫河源巴顏烏蘭處視之並不見西卜退哈灘巴圖爾等游牧屬裔地方皆已蹂躪取視牛矢猶然濕潤因思伊等必被噶爾丹劫掠未久隨行前進至拖諾立山岡遠望有大隊蔽地而來並無旗幟我等匿身山坳見頭隊輜重於薄暮時抵拖諾河屯劄首

尾絡繹不絕直至夜半始安營畢跨河而駐者
殆三十里營內巡警之人皆歌笑巡行聞彼歌
聲乃知為厄魯特翼日我等欲審厄魯特所向
潛於山中遠坳見頭隊輜重黎明動身驅牲畜
度拖諾嶺其尾隊至日昃後方度畢羊少而駝
馬甚蕃皆沿土喇河順流西去揆其去向有趨
庫黑納塔爾納之狀大約人馬行踪二萬有餘
俟噶爾丹兵過畢我等始歸謹具奏

聞

上諭議政大臣國舅佟國維等曰將軍費揚古報稱噶爾丹將喀爾喀西卜退哈灘巴圖爾及納木扎爾陀音等恣行劫掠即竄往土喇河順流而下西向庫黑納塔爾納以去以此揆之彼實無意內來京城所發大兵可暫還秣馬以待更行文諭盛京烏喇黑龍江將軍及科爾沁等諸扎薩克其預備兵且止仍檄知將軍費揚古彼所領兵衆亦權回本

汎將馬匹加意餵養若放喀爾喀等入喀倫內遊
牧恐有互相竊奪之事可檄尚書班第令彼在喀
倫外附近處暫居

壬午

命八旗武職大臣官員各陳所見

上諭大學士伊桑阿等曰噶爾丹侵擾外藩去來無定
備師剿寇共當熟籌着八旗滿洲蒙古漢軍凡都
統以下阿達哈哈番叅領以上各官於各旗聚議

噶爾丹若何勦除我兵若何設備議定由本旗陳奏苟言有可採朕即允行爾等其通諭知

甲申

命發四十九旗蒙古及喀爾喀兵聯屯於正藍旗察哈爾界上至喀爾喀河

上諭大學士伊桑阿等曰着於四十九旗蒙古每佐領挑選三四名令本佐領中每人各給馬三匹及甲胄助弓矢全副每月人給銀一兩又喀爾喀兵亦

選二千名俱照此例為之遣我內地章京操練聯
屯於正藍旗察哈爾界上以至喀爾喀河倘有舉
動該王貝勒貝子公台吉有願効力者即率此軍
而行則於事大有裨益俟噶爾丹事畢之時令是
軍各歸本旗當於今冬定議至來春草青時行之
爾等其會同議政大臣議議曰噶爾丹劫掠喀爾
喀之納木扎爾陀音西卜退哈灘巴圖爾則挑
選蒙古兵預備甚屬緊要宜欽遵

上諭而行今請於四十九旗每佐領或精壯甲丁或附
丁以五名筭共挑選六千六百名至喀爾喀衆
扎薩克亦應挑選二千名差大臣同該扎薩克
公閱挑選所選兵或缺有子弟精壯者補之子
弟孱弱自該佐領挑選補之兩佐領十人內委
署十長一員令所選兵自正藍旗察哈爾界上
至喀爾喀河隨宜結隊屯劄其屯是軍也不可
不就水草佳處其相水草也亦應差大臣往視

俟相地歸將所屯幾處以幾旗為一隊編列進

呈

御覽至來年草青時各就所指之地屯劄此所屯四十
九旗兵原有甲冑俱自本佐領內湊給每人馬
三匹喀爾喀之兵原無甲冑旗幟應令工部照
數製造驛遞解往至給此衆扎薩克兵之弓矢
應令京城大小各官助給此所屯兵每月人給
餉銀一兩所給銀自戶部解往所屯兵不可不

操練應各處挑選叅領一員散騎校二員護軍
校驍騎校二員遣往管領操練應撥各章京職
名著該部奏點此所點章京六個月一更換如
此軍有出行之事著該王貝勒貝子公台吉有
願効力者各率屬下所備兵而行俟噶爾丹事
畢之時是軍各歸本旗至總統是軍而行之大
臣臨時該部請

旨其往視水草往選兵丁應差之大臣名銜該部開

列引見

欽點奏入

上從之尋理藩院以往視屯地及往選屯兵之大臣入
奏

上曰尚有與蒙古諸王共商之處姑停之俟來年正月
開印後具奏亦無所悞也後以三路大兵進發遂
寢其事

十月壬辰

命議中西二路進剿事宜

上諭議政大臣國舅佟國維等曰二十九年噶爾丹大敗逃竄懼我軍窮追誓不復犯我朝降人喀爾喀近者背棄前誓肆掠納木扎爾陀音以去彼既食言在我亦當商確舉事可派西安寧夏滿漢兵從西路進京師兵從中路進派出之兵乘雪而行到彼時塞草青發可以前進其官兵作何議派師行糧食宜親攜幾月隨運幾月隨運之米或車載或

駝負所需駱駝車輛幾何及廝役之名數口糧一併核算其集議之議曰派發京師官兵前鋒八百名以每旗前鋒叅領前鋒侍衛各一員前鋒校六員率之親隨護軍兩佐領下合一名護軍每佐領下各一名以每旗護軍叅領三員每叅領下護軍校二員率之烏鎗護軍八百名以每旗護軍叅領一員護軍校七員率之烏鎗驍騎四百名以每旗驍騎叅領一員散騎尉二員驍騎

校四員率之八旗漢軍火器營兵共二千名每
旗綿甲軍各八十名以每旗或協領或叅領一
員操練尉操練校各五員率之滿洲礮每旗五
門各隨以撥什庫及驍騎三十七名以每旗散
騎尉二員驍騎校二員率之漢軍礮每旗十門
冲天礮每翼一門每旗各派礮手二十一名綿
甲軍十名撥什庫及驍騎六十名以驍騎叅領
各一員散騎尉各十一員率之再每旗派弓匠

二名傳宣二名每翼傳宣校一員其總領官兵
大臣都統每翼二員護軍統領各一員前鋒統
領兩翼一員副都統每旗一員漢軍火器營每
翼都統一員副都統一員管漢軍礮都統一員
副都統三員其察哈爾兵二千每旗派叅領或
次頭領一員閒散章京及驍騎校各五員喀喇
沁翁牛特兵一千派夸蘭大八員叅領及閒散
章京各四十員

盛京兵二千烏喇兵一千派夸蘭大八員叅領及
散騎尉驍騎校各四十員其所帶廝役名數將
軍十人都統八人前鋒統領護軍統領副都統
七人夸蘭大及叅領六人前鋒侍衛署叅領五
人散騎尉四人護軍校驍騎校三人護軍撥什
庫驍騎一人礮手綿甲軍二人合一人共計人
口三萬五千四百三十餘每口月計米二斗兩
月需米共一萬四千一百七十四石有奇如用

駝負計用駱駝九千四百四十餘如用蒙古車載其車數與駱駝同若以牛羊代一月行糧八十人計牛一頭半月需牛六千六百四十餘十人計羊一隻半月需羊三萬五千四百三十餘再西路進兵誠為勝算應選發西安滿洲兵三千漢軍兵一千綠旗兵六千派官分領其官兵人口幾何所需五月口糧作何親攜隨運應着彼處將軍總督巡撫提督總兵官會同確議

以聞議入

上從之復遣刑部尚書圖納赴陝西與將軍總督等會議

癸巳

命伯費揚古為右衛將軍

上諭大學士伊桑阿等曰右衛地方甚要將軍責任甚重朕再四思維惟費揚古堪任是職着授伊為右衛將軍仍兼攝歸化城將軍事務

己亥

命喀爾喀等仍於喀倫內游牧先是有喀倫內游牧之喀爾喀使在喀倫外地方游牧之

旨至是侍讀學士伊道奏言臣往躡探厄魯特聲息自克魯倫回至烏朱穆秦其地名吳爾揮見喀爾喀之達賴濟農告曰蒙

皇上俯憐喀爾喀

諭使入喀倫內游牧我等即遷來已至喀倫內兩三

日程之地今又使我等回至喀倫左側駐牧目
下雪大回路遠牲口不能到即勉強退去不
免遭厄魯特巴爾虎之害欲不退回又恐懼違
旨之罪欲遣使奏

聞又路遠不能立達據此具奏得

旨使喀爾喀遊牧者特憐之欲其生遂也今大雪之
時使之退回反致困苦伊道爾可與大學士理藩
院速議之議曰

皇上使喀爾喀於喀倫內遊牧原欲令其生遂特加矜恤之至意今於大雪時遣之退回則反困苦矣

請

諭尚書班第令喀爾喀在喀倫內距扎薩克蒙古一二日程地方離空游牧如有互盜駝馬牛羊諸畜者着尚書班第會同該扎薩克審明立行正法使之知儆仍速檄駐劄喀爾喀扎薩克地方管理盜賊偵探聲息官員遵照曉諭喀爾喀可

也

上從之

庚子

命預備官兵時尚書班第奏言臣遣人赴克魯倫等處偵得噶爾丹在義格穆爾布爾哈蘇泰之地度冬俟雪後乃行因真偽未審復遣員外郎達賴台吉格根鄉導萬舒克等佐以四十人往視厄魯特大勢踵其踪跡實探所往之地達賴等

於十月初六日回稱至克魯倫我格穆爾布爾
哈蘇泰地方匿身河岸望見對河有厄魯特人
衆自多羅忒延及巴顏額爾黑圖駐劄約三百
戶駱駝牛馬共千餘頭毳帳敞壞絕無羊羣其
人出入往來故未能悉數謹據奏

聞奏至

上諭議政大臣國舅佟國維等曰噶爾丹情性奸狡前
已有下雪時行走聲息今所報與前相符應飭兵

預備設彼數盡敢於嚴冬妄進我大軍可即行剿滅矣今每佐領派前鋒一名親隨護軍一名烏鎗護軍二名護軍五名烏鎗驍騎一名漢軍火器營兵二千以備所派兵卒可視人材矯健者選之其領兵大臣着兵部奏請再宣化府具有草豆於京師所畜馬匹內每佐領派馬十匹發往飼養咸令肥澤俟大兵行日每兵給京師馬三匹宣化府馬一匹其宣化府飼養之事應差部院大臣一員及

旗下大臣一員前往親督差往大臣着該部請旨
又時值嚴冬倘行進艱可令派出兵衆將所備禦
寒之羊裘煖帽諸物務須溫厚右衛將軍費揚古
處可令檄知其所屬兵衆亦預備以待尋以宣化
府督飼馬匹派出副都統凱音布學士博濟前
往

壬寅

命都統噶爾馬等赴察哈爾左翼駐劄偵探

上諭大學士伊桑阿等曰都統噶爾馬副都統碩岱着
往駐左翼察哈爾地偵探厄魯特聲息設有警可
傳集左翼察哈爾兵衆以待京師之兵

丙午

宥喀爾喀納木扎爾陀音等罪先是遣尚書班第傳
諭納木扎爾陀音內移納木扎爾陀音等不遵

諭旨潛於克魯倫處遊牧至是被厄魯特大掠且將
噶爾丹所差致書之人不行拘拿縱之使歸以

是納木扎爾陀音及其弟諾爾布額爾克台吉
弟之子龔厄多爾吉族兄之子諾爾布林陳等

至理藩院面縛跪訴服罪請死隨據奏

聞事下議政大臣議議以納木扎爾陀音等違

諭被掠且私自遣回遞書人大干

國典應正法議入

上從寬宥之

丁未

命詳議征勦噶爾丹事宜

上諭議政大臣公宗室蘇努等曰噶爾丹侵擾邊疆之事日厯朕懷故凡一切遣使及素所往來之人不憚諮問以是知其部落不過五六千人我大兵踴躍爭奮有願戰心而大臣官員逡巡退縮無意自効但云俟彼來前可與一戰若遠在克魯倫必待塞草萌達方可前行朕因憶曩日誘噶爾丹至烏闌布通我軍威甚盛不即為勦除致令逸去每一

念及心竊恨之匪獨在朕即下至編伍廝卒亦罔弗怨悔者近觀噶爾丹於巴顏烏蘭屯聚果有乘雪蠢動之意朕欲如前誘入內地諒其創痛之餘不復再至然彼縱不敢深入或潛來邊徼掠我外藩亦未可定聞警後始遣大兵勢不能朝發夕至我進彼退我還彼來再三若此凡蒙古諸部亦大遭其蹂躪矣是噶爾丹一事爾諸王大臣亦當留意可與八旗滿洲蒙古漢軍都統前鋒統領護軍

統領副都統等公同籌畫作何進止其詳議之議

曰

睿照旁燭誠如所慮今宜遣發師徒一舉殄滅請將
前議宣化府飼養馬匹停其發往每佐領下照
派出兵數畜馬四十匹每匹給銀四兩限四十
日速令肥健馬力一足即攜兩月糧赴巴顏烏
蘭進剿倘馬力未壯之先噶爾丹遽侵邊境可
於諸王及大臣官員自養馬匹內選擇可用者

儘給兵衆資其前進議上

上曰每佐領下馬十匹着仍發宣化府飼養

命調外藩兵兩路分防噶爾丹

上諭議政大臣公宗室蘇努等曰方今冬令噶爾丹雖不能親率其妻孥輜重前來或以遊騎潛掠喀倫近地亦未可定然諒其人無多我京師大兵不便輕於選發即遣往亦未必與彼相值朕再四圖維莫若以蒙古兵應之爾大臣前以其兵為不可用

朕默無一語今視蒙古兵無不可用者現今墨爾根濟農沙木巴帶青各備兵一千歸化城有將軍費揚古駐劄西路事柄應全付與右翼察哈爾兵歸化城兵及四子部落以西所有各扎薩克兵俱令伊酌量徵調分屯要害嚴斥堠遠偵探倘噶爾丹掠其附近邊境費揚古即率所備兵衆及墨爾根濟農等兵立行進剿其東路派出願効力大臣畀以重權凡左翼察哈爾兵兩蘇尼特兩阿霸垓

兩阿霸哈納爾兩萬齊忒兩烏朱穆秦及喀爾喀
主謝圖汗折卜尊丹巴貝勒席地西里班朱兒多
爾濟並左近所有喀爾喀扎薩克兵亦聽其酌量
徵調屯駐要地遠設遊偵倘噶爾丹掠其相近邊
境亦即率所備之兵立行進剿其東西二路大臣
凡有機宜互相關白甚於事有濟爾等其即集議
議曰

聖謨周至應各祇承除東路大臣另題請外其西路兵

衆即檄知將軍費揚古速行徵調倘噶爾丹小
隊遊掠可即撲滅若大衆入犯著一面奏報一
面調取右衛兵以備議上

上曰所議甚善移費揚古之文交關係賚往尋蘇努等
以遣往東路大臣恭請

親簡令往會都統噶爾馬副都統碩岱公同徵調諸蒙
古兵

上曰兩蘇尼特兩阿霸垓兩阿霸哈納爾旗兵著索額

圖前往收集鄂克濟哈扎喇克圖現赴喀倫索額圖可偕之去喀爾喀土謝圖汗等及兩蒿齊忒兩烏朱穆秦旗兵著明珠偕阿爾尼恩格森前往收集俱令各駐要地探聽聲息噶爾馬碩岱朕已令於察哈爾左翼駐劄毋庸遣動設有必不可已機務再行調取會同索額圖明珠等以行其理藩院官或別部院官聽所遣大臣酌量題帶伊等茲遣非取其奮勇一試也惟期一應聲息得其實耳

尚書班第雖現在彼偵探猶恐京師大兵難遽定
行止故復有此遣師之進否俟伊等報聞定奪其
立馳驛前去毋緩

聖祖仁皇帝親征平定朔漠方略卷十六

欽定四庫全書

聖祖仁皇帝親征平定朔漠方略卷十七

十一月壬戌

命分兵三路進剿噶爾丹時將軍伯費揚古奏言關
保賚兵部文到臣并傳

上諭以噶爾丹若在巴顏烏蘭度冬徂春應作何行事
為善下詢於臣臣敢不竭吐愚衷一一陳奏竊思
大興師衆直抵和卜多傾其巢窟自是勝筭但

窮荒遼絕師行似難今乘其在巴顏烏闌之地
分軍殄滅誠計之得者若俟塞草青發我軍始
進則寇馬已肥雖噶爾丹震懾

天威不敢犯我顏行或藉馬力之強竄逃亦易今請右
衛兵五千再增以京師兵五千此增發之兵即
於深冬秣馬咸令肥健俟青草方萌時我軍突
至則噶爾丹馬正羸瘦似可即行剿滅不致遁
逸至所集察哈爾兵六百歸化城兵八百四子

部落達爾漢親王毛明安三吳喇忒等兵六百
鄂爾多斯兵一千俱令裹兩月糧以進其大同
綠旗官兵五千宣化府綠旗官兵三千俱以烏
鎗從事再

上所頒發子母礮攻營破壘大為有濟乞

勅下附近省分協助一二百門送至軍前備用奏至
旨下議政大臣集議議曰右衛兵大同宣化綠旗兵
歸化城及四子部落諸蒙古兵俱應照將軍費

揚古所請如數徵派其請增京師大兵可於每
佐領預備十名兵內選撥護軍三名烏鎗驍騎
一名各帶廝役一人合為一幕每兵給馬四匹
派官分率恭請

親簡大臣統領前赴費揚古處再檄知江南省速送子
母礮二百門來京到日酌發西路議入

上曰我大軍進勦噶爾丹宜分為三路東一路仍派盛
京兵二千寧古塔兵一千黑龍江兵交將軍薩卜

素酌量派出再著科爾沁派兵四千令定期會合沿克魯倫進剿其西一路徵調各處官兵總轄於費揚古由歸化城進剿至中一路以京城每佐領下所餘預備兵六名及火器營兵與費揚古所請宣化府綠旗兵停其發往西路皆定為中路進剿此三路官兵俱令裹糧八十日中路隨運米石著諸王大臣官員急公之駝馬馱負倘不足即動支正項錢糧僱車裝載西路軍糧應隨運幾日著費

揚古明白具奏再師行惟馬最要東光吳橋景州
三處戶部現貯有芻豆每佐領下發馬十匹照宣
化府例交地方官飼養特遣大臣一員往督之是
師於來年何月何日啟行著費揚古定議以聞尋
以東光吳橋景州三處督飼馬匹派出刑部侍
郎陳汝器前往

甲子

命以右衛所貯子母礮運至歸化城將軍伯費揚古

奏言軍器中子母礮之用甚大蒙發臣軍子母礮二十四門現貯右衛倘有所用請飭右衛地方官運至歸化城自歸化城經行之地即於沿途所過旗分取駱駝為用回時亦照此例預備上從之

乙丑

諭蒙古備兵

上諭理藩院曰歸化城四子部落喀爾喀達爾漢親王

毛明安三吳喇忒六鄂爾多斯十科爾沁其兵數
已經派定應各傳示務屬兵秣馬以待至其餘旗
分雖未派定兵數亦應先期曉諭其軍器馬匹俱
令預加整備以俟徵發爾衙門可通行檄知

丙寅

命都統伊勒慎等率增發兵赴西路兵部奏增發西
路每佐領護軍三名烏鎗驍騎一名請派大臣
率往

上曰著都統伊勒慎護軍統領蘇丹副都統碩岱率往
命都統齊什出中路軍時中路備征之都統胡巴病
故此缺開列右翼滿洲蒙古都統職名具奏

上命派都統齊什預備

戊辰

命製綿甲

上諭兵部曰近將內造綿甲試以烏鎗不能貫入是此
甲大有造於軍士也應令浙江省製造五千江南

省製造三千福建省製造二千山東江西省各製造一千倘乏絲綿處即以紬足代之不必俟齊隨得隨解可頒內造綿甲五領差筆帖式分送五省以為式樣

授厄魯特降人阿穆呼郎等官時有厄魯特阿穆呼郎等四人來降

旨下議政大臣詢明具奏議政大臣隨詢阿穆呼郎等對以我等係阿喇卜灘台吉屬好貧乏異常

兼隨噶爾丹游牧不堪勞苦近聞

聖主之國太平鞏固凡屬歸順之人靡不坐享安樂故我等四人自巴顏烏闌逃出星夜疾走來歸

聖明噶爾丹向踞和卜多地方於本年二月間挈家游牧直至八月內至克魯倫河源處屯聚隨授阿喇卜灘台吉丹濟喇丹津俄木布等兵三千渡克魯倫河掠喀爾喀納木扎爾陀音及巴爾虎等沿克魯倫上流而返噶爾丹順流來迎會於

巴顏烏闌遂合家環居其地作度冬計兵有六
千因掠得納木扎爾陀音等以故牲畜備具噶
爾丹於枯庫得勒蘇一路俄濃巴爾濟一路克
魯倫下流一路此三路每路遣人三十名安置
汛哨策旺喇卜灘現駐厄輪哈必爾哈之地與
噶爾丹仍前不睦絕不通使噶爾丹屬下人衆
多有逃往策旺喇卜灘處者喀爾喀根敦帶青
聞現居七斯希卜其餘喀爾喀不獲詳知再噶

爾丹意欲舉兵內入因伊拉古克三庫圖克圖以路遠勸止據此轉奏

諭曰可將伊等歸併上三旗阿穆呼郎等俱授為六品官仍給田產衣食等物加意軫卹尋噶爾丹屬裔舒格卓里克等來歸其安置亦如之

已已將軍伯費揚古等奏報率兵駐劄形勝偵探禦備費揚古奏言臣等接理藩院咨稱奉

上諭據班第報噶爾丹有欲掠墨爾根濟農之言可速

檄將軍費揚古尚書班第加意防備臣等欽遵
議於本月初八日起行墨爾根濟農等現居蘇
尼特王杜稜旗下甌耳之地以故寧夏將軍覺
羅舒恕率兵一千五百往歸化城北山後厄勒
蘇台地方屯劄備禦臣費揚古親率兵一千五
百往四子部落旗分阿爾察圖蘇木哈達地方
屯劄備禦副都統阿南達侍郎滿丕二人酌率
喀爾喀兵赴阿爾察圖蘇木哈達以至甌耳地

方擇兩間形勝處屯劄備禦臣等三處各行偵探倘有警臣等公商行事奏入

上從之

乙亥以衛徵喇嘛等交通伊拉古克三執而囚之先是副都統阿南達以喀爾喀王善巴長史多爾濟有回子告之云伊拉古克三前世僧徒俱住居河套爾等當防之必有日受此輩之害

奏

聞

上使阿南達將伊拉古克三僧徒內大弟子俱遣至京
交將軍費揚古等查明具奏至是阿南達解伊
拉古克三僧徒衛徵喇嘛其弟孫魯卜其徒喇
克巴格隆海喇圖囊素羅卜臧丹津丹津厄木
齊沙塔爾及家人朱喇圖達爾扎來費揚古等
查厄魯特察罕台吉之回子巴圖哈什哈所首
尼克塔鄂木布喀爾喀扎薩克一等台吉額爾

德尼滾占哈灘巴圖爾旗下地方伊拉古克三
所遣羅卜臧端魯卜及其弟達爾扎尼爾巴格
隆台吉諾爾布之妻其子老章噶爾旦等陸續
解到理藩院同三法司奉

旨會審以羅卜臧端魯卜尼爾巴格隆尼克塔鄂木
布皆伊拉古克三所遣奸細是實伊等不但為
奸細且煽惑蒙古之心應皆凌遲處死衛徵喇
嘛喇克巴格隆海喇圖囊素羅卜臧丹津朱喇

圖達爾扎等不但與伊拉古克三交通信息又祭壇致禱願與伊拉古克三完聚意欲迎噶爾丹之兵而降應將伊等立斬其財產俱入官丹津厄木齊及羅卜臧端魯卜之弟達爾扎俱病故無庸議奸細羅卜臧端魯卜往衛徵喇嘛家探信時有孫魯卜沙塔爾在坐知情是實應將伊等枷號兩個月鞭一百諾爾布之妻收逃叛人伊拉古克三弟托博克妻所寄物而不出首

當枷號兩個月鞭一百但係婦人准贖老章噶
爾旦革去四等台吉枷號兩個月鞭一百衛徵
喇嘛喇克巴格隆海喇圖囊素羅卜臧丹津丹
津鄂木齊之徒弟二百餘人及衛徵喇嘛家中
所有貨產人口應差官查明解京其奴僕財物
入官其徒弟為喇嘛者發

盛京廟中文與大喇嘛安插孫魯卜沙塔爾枷號
完日鞭一百亦皆交

盛京廟中大喇嘛仍檄

盛京將軍查安插之喇嘛不許他往其內厄魯特
之人皆發往杭州與窮披甲為奴回子巴圖哈
什哈既經出首奸細羅卜臧端魯卜尼克塔鄂
木布應安插正黃旗蒙古旗下食護軍之糧議
入

上曰此奏暫存之

丙子將軍伯費揚古奏報西路進兵日期先是

上以大兵進發檄費揚古定期具奏至是費揚古奏言
巴顏烏闌距歸化城約二千里西路進勦官兵
除自賫糧八十日外應復隨運兩月行糧其所
調各路兵衆俱令明歲齊集歸化城定於二月
二十日前後啟行京師馬匹雖飼養肥澤但自
京至歸化城千里驅行不無蹄傷臙減請預發
兵至大同近邊之地秣養四十日為便奏至

上諭議政大臣公宗室蘇努等曰會兵期發秣馬贏糧

俱如費揚古所請其隨運之米可定為五十日現
今大同附近諸處未經積貯草豆著戶部派才能
官一員往同該撫約計馬二萬匹四十日芻秣之
需速行購備京城每佐領下添撥西路之護軍三
名烏鎗兵一名令於今冬十二月望後起程至大
同養馬四十日如期赴歸化城進發再宣化府現
餽馬匹亦著帶往西路備用其中路進兵之期俟
遣往費揚古處人回定奪至中西二路隨運軍糧

另核議以聞

命左都御史于成龍督捕侍郎李鈞大理寺卿喻成龍督運中路軍糧

上諭大學士伊桑阿阿蘭泰戶部尚書馬齊等曰中路進剿首重軍糈其輓運一事必得大臣統攝始克有濟如于成龍李鈞喻成龍願為朕効力不及此時更待何日子成龍等踴躍請行遂有是

命

丁丑

命議中西二路輓運事宜時大學士伊桑阿等遵

旨會同兵部集議西路進勦右衛兵五千京城增發

兵三千四百七十大同綠旗兵五千合官兵廝

役計二萬四千二百六十名有奇先經議政大

臣僉議京城增發兵每佐領下護軍三名烏鎗

兵一名俱給馬四匹帶廝役各一名合為一幕

各費口糧八十日共四石二斗六升餘甲冑四

副戰箭二百二十枝帳房二鍋二鑕斧鋤各
一行囊四及各種需用雜物通重九百七十五
觔零馬十六匹兵身廝役各乘一餘八匹以充
馱負每匹應分負一百二十觔零右衛兵亦照
此例凡西路各處官兵所自賣口糧外每名月
給米二倉斗計五十日需米八千八十七石零
以湖灘河朔倉貯之米隨運其運車令山西省
備具一千一百輛除車夫口糧馬騾料豆每車

約載米六石共裝六千六百石所餘之米將宣
大二府所餽駱駝負運其運車令山西省官役
俸工銀捐僱至馬騾所食料豆輓車兵口糧以
及鞍屨繩索米袋等物俱著該撫備給并遴才
幹道官一員同知知州知縣等官四員同選派
部院衙門賢能官四員隨車押運請於

特簡于成龍等三大臣內分撥一人佐以一滿洲堂官
速赴山西會同巡撫溫保料理諸務其輓車牽

駝應用兵二千以撫標步兵派之倘不足以鎮
標步兵足之至中路進勦京中每佐領兵六名
漢軍火器營兵二千及隨礮兵共計八千一百
三十名每名給馬四匹各帶廝役一名合為一
幕所帶帳房諸物俱照西路例礮手綿甲軍八
百八十八名兩名合一廝役又

盛京兵二千寧古塔兵一千黑龍江兵約二千宣
化府綠旗兵三千合官兵廝役通計三萬二千

九百七十名零京中官兵及

盛京寧古塔黑龍江官兵各賚八十日口糧外每名月給米二倉斗共需米一萬三千一百八十八石零以通倉米運給其運車令直隸山東河南三省各出一千三百三十三輛每輛載米六石與西路同計共載二萬四千石車自河南出者即派本撫標步兵輓之不足繼以本省鎮標步兵自直隸山東出者以直隸撫標及天津古

北二鎮標之步兵克用三省捐僱車輛及兵夫馬騾需用食物并才能押運官員俱著各該撫備給遴選亦與西路同再遴部院衙門賢能官十二員每省派四員分管尾隨中路大兵前進其總理運務既經派出于成龍等諸事應令會同料理議上

上曰運米車輛著動正項錢糧備造既派出于成龍等使之專任嗣後凡關運米機務即自行奏請不必

會同該部押運官員亦著伊等選擇具題牽輓兵卒給與行糧餘如所議

戊寅

命通政司左通政喀拜協理中路運務

命發內帑金製造中路米車

上諭大學士伊桑阿等曰中路運米車四千輛若責令直隸山東河南三省捐催恐各地方官不體朕意借端科派致累小民朕今并不動戶部錢糧特發

內帑金六萬兩著于成龍等督造但每車載米六石及炊具營帳諸物過重可添造一千輛以足用至朕營需用車輛亦不必令地方官預備即於添造車內撥二百餘輛供應尋于成龍等請以監察御史鮑復盛等十員分任監造車輛

上從之

命光祿寺卿辛寶內閣侍讀學士范承烈督運西路軍糧

命喀爾喀台吉車卜登襲封護國公授為扎薩克時
郎中殷扎納奏言內大臣吳巴什等遣臣往諭
喀爾喀公憨都等內移臣攜王納木扎爾之子
汪扎爾四十餘人前往在喀拉呼濟爾地方以
俟憨都之至憨都於十月初四日至臣所駐劄
初六日早憨都及台吉占巴喇等首倡率衆身
擐甲冑執我等四十餘人劫去諸物褫去衣服
而北徙帶至五站外納罕臺地方始釋臣等彼

竟北徙而去臣等南歸日夜步行慙都親兄台
吉車卜登使其子圖巴等攜衣食牲畜迎至吳
爾圖地方乃乘馬駝於十五日到車卜登家車
卜登言慙都遣其台吉占巴喇招我作速遷往
吾言我輩皆卑微台吉並未嘗効蟻力於

聖主蒙

皇上垂念祖先錫之以公授為扎薩克今叛投何邦欲
比此更求榮顯乎我豈肯偕爾福盡之人同行

悖逆而負

聖上之恩玷祖父之名乎以是語占巴喇而遣之去我
當即與貝勒盆楚克率所有兵衆往追慙都謹
具奏

聞

上曰慙都逃去時台吉車卜登感朕之恩念其祖父之
名不與偕往且授其子圖巴等餼糧牲畜令迎章
京殷扎納誠心効力親率兵往追殊為可嘉著將

愍都護國公革去即以車卜登襲封授為扎薩克
後俄羅斯擒解愍都併其諸子俱正法

庚辰

上幸南苑閱兵

上諭內大臣國舅佟國維等曰用兵之道以賞罰為要
今日大閱朕將降勅以昭示勸懲爾等其視之

勅曰本朝用兵以來所向無敵野戰則勝攻城則克
惟有弓矢劍戟為用自三逆叛後南方皆稻田賊

人雖用火器相持而凡遇之敵靡不摧敗朕以故洞悉特立火器製備鎗礮交發八旗由是我朝之威靈益震於四域矣今噶爾丹遊魂假息於喀爾喀左近肆行竊掠朕欲一舉立殄是以整理諸路糧餉器械熟計而行是師之舉與昔不同茲爾將卒以下廝役以上各當勉力如不遇敵自不必言倘遇敵奏凱而還朕必大霽殊恩陣亡者除照常給賜身價外護軍則廕一子為七品官食俸驍騎

則廕一子為八品官食俸如無子則照本身錢糧
給其孀妻終老所借公庫官銀另加寬卹倘違軍
令勿得仍望如前矜宥必照

太祖

太宗

世祖皇帝之律治罪內大臣等讀畢奏曰陣前効力兵丁
向有叙賞之例今

皇上破格授官於護軍驍騎且加恩於其妻子誠亘古

未有之

浩蕩宏恩也衆官兵自當感激奮勇百倍於常一遇
噶爾丹則生擒無疑矣

上曰今日大閱畢可宣勅曉之維時南苑西紅門內曠
地八旗官兵鎗礮按旗排為三隊第一隊以漢
軍火器營烏鎗步軍居中礮位排列左右滿洲
火器營烏鎗馬軍列於礮位兩頭第二隊以前
鋒兵居中八旗護軍續列兩頭第三隊排列八

旗護軍兩翼則設立應援兵軍馬衆多不見涯
際器械鮮整旌旗蔽天耀日爭輝神威莫敵辰
時

上率

皇太子

諸皇子俱擐甲前張黃蓋內大臣親近侍衛大學
士及兵部諸大臣俱擐甲附近護從繼以豹尾
鎗侍衛隨行鎗後建兩大纛上三旗侍衛俱擐

甲整肅擁護隨之

上遍閱八旗兵陣及火器營軍容畢

中立於馬軍之前鳴角者三擊鼓步軍舉鹿角大礮衆兵齊進鳴金而止齊發鎗礮一次如此九進至十次連發大礮火器營馬步軍循環連發烏鎗畧無間斷其聲震地礮聲畢各開鹿角為門後二隊馬兵逐隊而出頃刻列齊鳴角大呼而進復鳴角收軍立於本陣結隊徐旋行伍甚

整其殿軍擁後而立時噶爾丹處降來阿穆呼
郎等見此大閱駭甚戰慄而言曰

天朝之兵廼如是可畏耶噶爾丹不日殄滅矣我輩早
降者誠大幸也

上顧用兵諸臣問曰爾等遇敵其交戰之狀亦若是乎
諸臣奏曰雖大畧如是而無此嚴整至火器營
規模不但與綠旗兵迥異即前古亦未能比有
何敵之不摧乎大閱畢

上還至行宮前率

皇太子

諸皇子甲而騎射

上騎而射者再步而射者再矢無虛發皆中其的侍立
大小諸臣皆以

皇上武畧絕倫天縱神奇無不驚異尋內大臣國舅佟
國維等奏曰臣等遵

旨於大閱之地宣

聖諭畢衆官兵皆踴躍歡呼而言曰我等小卒蒙

聖主養已極今復降

溫旨加我等妻子以

厚惠我等真不克當但願幸遇敵寇各効死力寸磔

噉爾丹以報我

皇上之恩而已

諭曰行軍以得人心為要衆心悅則誠為大快矣是

日

上加惠官兵於未閱之前

賜食既閱之後

賜酒

臣謹按我

國家兵力精銳所向無敵由來舊矣但領兵將帥或
違

皇上指麾是以前此烏闌布通未能殄寇致噶爾丹逸
去失此機會時厓

聖衷念噶爾丹一日不滅則疆場一日不安遂決計定
謀

親行征討又恐彼避我軍鋒向西奔遁乃議分兵一支
授大將軍費揚古堵截西路籌畫既備聿整
師旅練彌加練精益求精爰

駕臨南苑集衆大閱是日

躬擐甲胄丕揚威武天宇晴和鎧仗鮮麗新造火礮
制度精奇紀律嚴明隊伍整肅又

特降諭旨申明賞罰大加恩賚以鼓勵人心於是將士無不踴躍感奮勇氣倍加一可當百後

皇上親統六師深入絕域噶爾丹不能抗拒

天威果棄其妻子輜重星夜奔竄又猝遇我西路預備之兵遮擊大敗畜產無存噶爾丹僅以身免未幾自戕餘衆潰散於以知

皇上智勇天授誠邁百王而超千古也

癸未內大臣索額明珠等奏報分派外藩兵

安設汎哨索額圖等奏言臣等欽遵

上諭往派兩蘇尼特兩阿霸垓兩阿霸哈納爾兩蒿齊
忒兩烏朱穆秦及喀爾喀折卜尊丹巴士謝圖
汗貝勒席地西里扎薩克台吉班朱兒多爾濟
等旗兵令俱於各扎薩克處預備合兩旗為一
汎哨共立六汎以偵聲息臣等現於阿霸垓王
所居蘇巴海之地駐劄

甲申

諭卿辛寶等會同山西巡撫督造西路米車時西路
督運臣辛寶范承烈瀕行恭請

訓旨

上諭輓輸朔漠車輛甚為緊要爾等其會同山西巡撫
動支正項錢糧速行備造勿致累民輓車兵卒給
與行糧地方官有才具者任爾等選擇帶往其管
兵官員與輓車人等亦必擇精壯者用之

乙酉

命平陽總兵官毛來鳳率兵護運西路軍糧先是

上諭兵部山西省輓車牽駝兵卒著平陽總兵官毛來

鳳率領隨督運大臣前往至是毛來鳳奏言撫標

及臣標下共選派兵二千四百名但均係步卒

祇供牽輓其前後防禦恐不能緩急為用臣請

選騎兵二百名帶往以備驅使

上從之

戊子

命以安北將軍伯費揚古為撫遠大將軍

欽天監奏定增發西路大兵行期先是戶部遵諭派員外郎綽奇往同山西巡撫溫保購置草豆以備京城添撥西路大兵赴大同養馬之用至是綽奇賫溫保奏至以馬匹所需草豆臣已派官速辦親自督催必無遲悞京師所派官兵應令擇吉啟行

旨下欽天監奏十二月二十戊申日巳時大利軍行

阿爾必特祜以噶爾丹奏章歸復

命先是噶爾丹率兵近至西卜退哈灘巴圖爾納木

扎爾陀音所居之地侵掠喀爾喀特

遣五品官阿爾必特祜賚

勅往訊噶爾丹來意至是阿爾必特祜歸以噶爾丹

奏章至其詞曰謹奏


洪仁皇帝睿覽蒙遣使書不勝歡忭辛未年來草美獸

蕃乘便有行想

皇上亦鑒悉之矣念與蒙古疆界相近恐有妄行故為之禁止遣人一隊遺書道意而納木扎爾陀音等反以為往攻棄其牲畜而去至所云掠喀爾喀之事乃我界上行人所劫我不之知至達賴喇嘛所差濟隆庫圖克圖與內大臣吳丹等所定之議前經節次上奏伏乞

洪仁皇帝仍照前奏加恩雖有罪愆亦乞寬宥果若有理乞降

溫肯不勝欣悅



聖祖仁皇帝親征平定朔漠方畧卷十七